



DI ADIÉ POU VAYAN JOUWA

Lannuit maré toupatou, pèsonn pa ka konprann,
Dlo-la ka sonné luil
konkidiré chien té ka niché-y.

Paytivié ka palé ba lanmè é tout pep a-y,
krabié, krab blan, krab a bab,
yo ka kriyé mantou pabò Matnik...

Ago, ago, ago!
Pa ni dlo, yenki kracha
Ago,sa ki chapé mizè
Déviré aka gangan...

Nwèsè ka voplé nwèsè pou chaltouné déviré chimen
Goj sek, lang a-yo étenn.

An tan nonm té ka fè dot moun touné bèsio, pli ba ki zozio...
An tan movezté té kon hazié an tjè a-yo, sé kalté zawa-lasa,

Mi la, ou! La yo té ka fè afritjen rantré pa krèy :

Banbara, Menndé, Ibo, Kongo, Kaplao, wolof, kisisi-kisala.
Mi la lavi té ka konmansé nèy,

Anba vant a woch maché lannuit,
maché lajouné, maché, maché,
Alé, alé, téré anvan ou mò,
Maché, maché, monté an bitasion...

Twa siek-tan, twa latilié tan fè sik,
Twa (san a-w menm) andidan tan
Maché, maché, kritinisé
Halé kalpat anba fwèt, halé-y...

Épi lè rivé on jou
Nonm doubout kon nonm,
Palé kon nonm
Vlé viv kon nonm
Fanmi vini fanmi
Pitit vini pitit
Moun pa ka pitité zannimo pou fouré anba jouk...

Dèyè chèz a madanm vanté yo épi fèy a latannié...
Dèyè chèz a misié pran lodè pété,
Dèyè chèz a monpè pran lodè sièj
Men si w té pé arété
Pran lodè a pété ka pit...

Tanbou la sonné bel kri
Gwoka ann wouvè gojèt
Kannon wouklé kon loraj
Boula, gason, Boula...

Dèpi Lapwent janbé pies-kann
Pilé lonbraj, pilé lapérezité,
Kalbandé movezté é haysans
Chalviré lanmò an dalo,
Tout nonn sé nonm, noutout moun...

Solda pa vwè yo, mako osi
Kannot pran dlo janbé dot dlo,
Lespérans vini bwa flo pou yo
Monté, monté, monté monn...

Ravet douvan poul a gran bèk



Bayonnet paré sengné solda
Sé la pa ta yo, sé la a pa yo
Manjmoun ki la, moudong ki la.

Onsel blow, disparet pran fréchè,
Tout biten voltijé anlè, moun, kaz, fewman...

Di adié pou man Dévayé,
Lapwent,
Zabim,
Gripon,
Kannal,
Godjet...

Bouk é bitasion,
bakadè évè ravin.

Onsel blow yo fini bat avè-w frè,
Yo mété dlo lanmè an zié a moun
Yo mété lasid an tan-nou,
gadé nou la kanmenm...
Nou vwè yo kon djenbo, gey yo!
On jou ké jou pouvré ba nou tout.

Sa pé on jou
Siwvwè an pa la
Foumi é konpè krab
Ké jis trapé bab
Pou vin di mwen

Lavi sé lavi
Sa pé osi
Tousa sé blag
Mas obliyé
Adan chanté nwel

Miziré,
Miziré
Fiziré
Bo!
Zel a-w yo tayé.

